

आकाशवाणी जयपुर-अजमेर
प्रादेशिक समाचार

दिनांक 04.05.2025

समय: 18.45 बजे

- केंद्रीय संस्कृति अर पर्यटन मंत्री गजेन्द्र सिंह शेखावत कह्या-केन्द्र सरकार री नीतियां सूं देश मांय पर्यटन रा हलका मांय नया मौका बण्या है।
- मेडिकल कॉलेजां मांय दाखिला खातर आज देशभर रा पांच हजार परीक्षा केन्द्रां माथे **नीट यूजी परीक्षा** राख्यी गयी।
- भ्रष्टाचार निरोधक ब्यूरो बागीदौरा विधायक जयकृष्ण पटेल ने रिश्वत रा मामला मांय गिरफ्तार कर्यो।
- प्रदेश मांय पश्चिमी विक्षोभ रा असर सूं केई ठौड़ां माथे आज भी आंधी अर मेह बरसबा रे सागे कठे-कठे ओळा पड़्या-मौसम महकमां रे मुजब आवता सात दिन लू चालबा रा आसार नी है।

000

जयपुर मांय आज सूं **द ग्रेट इंडियन ट्रेवल बाजार** रो 14वों संस्करण राख्यो जा रह्यो है। तीन दिन ताई चालबा वाळा इण आयोजन रे तैत आज **'मीट इन इंडिया कॉन्क्लेव'** मांय केंद्रीय संस्कृति अर पर्यटन मंत्री गजेन्द्र सिंह शेखावत कह्या के मोदी सरकार री नीतियां सूं देश मांय पर्यटन रा हलका मांय केई नुवां काम व्ह्या है। वणा हाल ही मांय पहलगाम मांय व्ह्या हमला सूं उपज्या हालात माथे कह्या के भारत बेगी ही जम्मू-कश्मीर समेत देशभर मांय पर्यटन रा हलका मांय नुवी ऊंचाईयां माथे पूगेला।

श्री शेखावत कह्या के आज रो भारत विश्वस्तरीय कन्वेंशन सेंटर्स अर उच्च स्तरीय आतिथ्य सेवावां सूं सुसज्जित है, इण रे सागे ही बेहतर हवाई अर रेल संपर्क रे सागे एक समृद्ध सांस्कृतिक विरासत रा रूप मांय भी दुनिया खातर आकर्षण रो केंद्र है। इण भांत रो संयोजन दुनिया रा घणा थोड़ा देशां रे कन्ने है। कार्यक्रम मांय उपमुख्यमंत्री दिया कुमारी, नीति आयोग री उपाध्यक्ष सुमन बेरी समेत पर्यटन क्षेत्र सूं जुड़्या विशेषज्ञ अर न्यारा-न्यारा संगठनां रा नुमाइन्दा मौजूद रिया। इण आयोजन रो औपचारिक उद्घाटन आज सिंज्या साढे सात बज्या व्हेला। बतायो जावे है के **द ग्रेट इंडियन ट्रेवल बाजार** मांय पर्यटन अर ट्रेवल सूं जुड़ी तीन सौ सूं बत्ती स्टॉल्स लगाई गई है। तीन दिन री इण प्रदर्शनी मांय देश-दुनिया रा पर्यटन व्यवसायी, टूर ऑपरेटर अर ट्रेवल विशेषज्ञ भाग ले रह्या है।

000

सांसद संपर्क संवाद यात्रा

केन्द्रीय वन अर पर्यावरण मंत्री भूपेन्द्र यादव आज सांसद संपर्क संवाद यात्रा रे तैत कोटपूतली-बहरोड़ जिला रा केई गांवां रो दौरा कर्या। इण दौरान गांव मांय केई ठौड़ां माथे वां रो स्वागत कर्यो ग्यो। श्री यादव इण दौरान सगळा गांवा मांय पौधा दे र सगळा सूं बत्ता ऊं बत्ता पौधा लगाबा ने कह्या। वे कह्या के केन्द्र अर राज्य सरकार आमजन रा विकास खातर कमरकस राख्यी है। श्री यादव एक पेड मां के नाम अभियान ने प्रधानमंत्री नरेन्द्र मोदी री बेहतरीन पहल बताता थकां कह्या के इण रे जरिये आमजन पर्यावरण ने बचावा मांय आप रो योगदान दे सके है।

000

वायुसेना प्रमुख एयर चीफ मार्शल अमर प्रीत सिंह आज नुवी दिल्ली मांय प्रधानमंत्री नरेन्द्र मोदी सूं मुलाकात करी। पहलगाम आतंकी हमला रे पाछे भारत अर पाकिस्तान रे बीच बढ़ता तनाव रा हालात मांय इण मुलाकात ने महताऊ मान्यो जा रह्यो है।

000

कृषि मंत्री शिवराज सिंह चौहान आज नुवी दिल्ली मांय भारतीय कृषि अनुसंधान परिषद –आई.सी.ए. आर. कानी ऊं विकसित भारत री जीनोम संवर्धित चावल री पहली दो किस्में जारी करी है। कार्यक्रम ने सम्बोधित करता थकां वे कह्या के आज इण किस्मां सूं देश मांय चावल री पैदावार बढ़ेला अर उत्पादन लागत मांय कमी आवेला। श्री चौहान कह्या के आई.सी.ए.आर. ने आप रा शोध ने सीधा काश्तकारां ताई ले जाणो पड़ेला। कृषि मंत्री कह्या के कहा बढ़ती आबादी री पोषण सू जुड़ी जरूरतां ने पूरो करबा खातर उत्पादन बढ़वा री जरूरत है।

000

प्रदेश मांय खान महकमो हरियालो राजस्थान अभियान रे दौरान 20 लाख पौध लगावेला। महकमां रा प्रमुख सचिव टी रविकांत विभागीय अहलकारां ने मानसून सूं पैली पौध रोपण रो लक्ष्य जारी करबा रे सागे जरूरी तैयारी करबा रा निर्देश दिया है। श्री टी. रविकान्त बताया के हरियालो राजस्थान अभियान रे दौरान पौधारोपण मांय माइन्स धारकां, माइनिंग एसोसिएशन, विभागीय अहलकार री सहभागिता तैय करी जावेला। अभियान रे दौरान छायादार–फलदार पेड़ां मांय नीम, बड़, पीपल, आम, शहतूत, शीशम, गुलमोहर, अशोक, जामुन अर कम पाणी मांय बेगी बढ़बा वाळां पेड़ां ने लगायो जावे।

000

मेडिकल कॉलेजां मांय दाखिला खातर आज देशभर मांय नीट यूजी परीक्षा राखी जा रही है। या परीक्षा देशभर रा पांच हजार सूं बत्ता केन्द्रां माथे व्ही। विदेशां मांय भी इण परीक्षा खातर 13 शहरां मांय भी केन्द्र बणाया गया हा। राष्ट्रीय परीक्षा एजेंसी–एन.टी.ए. रे मुजब परीक्षा खातर 23 लाख सूं बत्ता पढ़नियां पंजीकरण कराया।

प्रदेश रा 25 शहरां मांय नीट यूजी परीक्षा राखी गयी। सब ऊं बत्ता 90 परीक्षा केन्द्र जयपुर मांय बणाया गया। इण परीक्षा रे जरिये देश रा मेडिकल कॉलेजां मांय करीब ढाई लाख सीटां माथे दाखिल व्हेला। इण मांय एम.बी.बी.एस., बी.डी.एस., आयुर्वेद, पशु चिकित्सा अर नर्सिंग कोर्स भेळा है।

000

भ्रष्टाचार निरोधक ब्यूरो बांसवाडा जिला रा बागीदौरा विधायक जयकृष्ण पटेल ने रिश्वत रा मामला मांय जयपुर सूं गिरफ्तार कर्यो ग्यो। एसी.बी.टी. टीम उण ने उण रा ज्योति नगर रा सरकारी आवास सूं पूछताछ खातर डिटेल कर्यो। एसीबी रा महानिदेशक रविप्रकाश मेहरडा आज जयपुर मांय ए.सी.बी. मुख्यालय मांय प्रेस वार्ता मांय बताया के विधायक पटेल माथे एक निजी कंपनी सूं काम कराबा रा एवज मांय ढाई करोड़ रिप्यां री रिश्वत मांगबा रो आरोप है। शिकायत मिलबा रे पछे ब्यूरो मामला रो सत्यापन कर सर्विलांस माथे निगराणी सुरू करी।

ध्यानजोग है के भारत आदिवासी पार्टी रा विधायक जयकृष्ण पटेल 2024 रा उपचुनाव मांय बागीदौरा सीट सूं जीत हासिल करी ही।

000

अर अबे वेक्स सूं जुड्या समाचार –

सूचना अर प्रसारण सचिव संजय जाजू कह्या के वेक्स मांय भाग लेबा वाळो हर एक किएटर बेहतर कलाकार बणर जा रह्यो है। वे आज मुम्बई मांय वेक्स रे दौरान राख्या सांस्कृतिक सत्र ने संबोधित कर रह्या हा। श्री जाजू कह्या के जो संगीतकार **क्रिएट इन इंडिया चैलेंज–सीआईसी** मांय वे सगळा आप रा प्रदर्शन सूं भारत रो सार दर्शाया है। वे कह्या के सरकार सी.आई.सी. रा सगळा विजयी संगीतकारां ने भविष्य रा अंतरराष्ट्रीय दौरा अर प्रदर्शन खातर शामिल करेला। वे कह्या के वेक्स इण टेम मांय अनूठी प्रतिभावां ने सामे लाबा मांय मदद करी है। जद के भारत मांय इण भांत रा पेशेवर बैंड री कमी है जो वैश्विक मंच माथे भारत रा सार ने प्रदर्शित कर सके।

000

प्रदेश रा बाघ अभ्यारण्यां मांय बाघां रो कुनबो बढ़बा रो सिलसिलो जारी है। सवाईमाधोपुर रा रणथम्भौर राष्ट्रीय उद्यान सूं एकर फेरु खुशखबरी आयी है। वटे री बाघिन टी-111 शक्ति आप रा

दो शावकां रे सागे निजर आयी। इण खबर रे पछे वन मेहकमां रा अहलकार हलका री प्रभावी मॉनिटरिंग रा हुकम दिया है। बत्ती जाणकारी म्हाका खबरनवीस सूँ—

000

प्रदेश मांय पश्चिमी विक्षोभ री बजह सूँ मौसम रो मिजाज बदल रह्यो है। राजधानी जयपुर समेत केई ठौड़ां माथे बादळ छाया व्ह्या है। श्रीगंगानगर मांय काल दे रात मेह बरबा रे सागे ओळा पड़्या। **हनुमानगढ़ जिला मांय मेह बरसबा सूँ लोगां ने गर्मी सूँ राहत मिली।** मौसम केन्द्र जयपुर रे मुजब आज सूँ सात मई ताई राज्य री केई ठौड़ां माथे मेह बरस सके है। जोधपुर, उदयपुर अर पाली जिलां मांय 5 सूँ 7 मई रे बीच घटाटोप मेह बरस सके है। मौसम केन्द्र रे मुजब आवता एक हफ्ता ताई राज्य मांय लू चालबा रा आसार नी है। वठिने मौसम मेहकमो खराब मौसम रे दौरान खुली ठौड़ा माथे जाबा अर बिजली रा खम्बां रे कने नी नी जाबा री सलाह दी है। ।

000

राज्य रो पशुपालन मेहकमो दोपहर री टेम भारवाहक पशुवां ने काम मांय लेबा माथे रोक बाबत् निर्देश जारी कर्या है। प्रदेश मांय पड री गर्मी माथे घोड़े, गधे, खच्चर, भैंस, बैल मांय हीट स्ट्रोक, पाणी री कमी रे चालता आ जिनावरां ने मुश्किल रो सामनो करणो पड रह्यो है। नियमां रे मुजब किणी भी जीव जंतु की देखभाल करणो उण ने राखबा वाळा हर व्यक्ति रो कर्तव्य है। जिण हलका मांय बत्तो तापमान 37 डिग्री सूँ बत्तो व्हे रियो है वठे दोपहर री 12 सूँ 3 बज्या ताई भार वाहक पशुआं सूँ काम नी करायो जावेला।

000